

**MOP. MS MAKHANYA, MOGOKGO LE
MOTLATSAMOTŠHANSELARA
YUNIBESITI YA AFORIKABORWA
PUO: DIJO TSA MAITSEBOA: MOLETLO WA DIKGELE TSA
DIPATLISISO**

***"Go dira le baagi go lebisa kwa phitlhelelong ya Diphitlhelelo
tsa Tlhabololo ya Leruri (SDGs)"***

**BALLROOM, GALLAGHER CONVENTION CENTRE, MIDRAND
6 MOPITLWE 2020**

Re leboga Motsamaisatiro wa rona, Ngk. Genevieve James,
Mothusamokaedi: Puisano le Baagi (Community Engagement)
kwa Unisa

- Motšhanselara wa Unisa, Moporesidente Thabo Mbeki
- Modulasetilo wa Lekgotla la Unisa, Rre Sakhilane
- Ditokololo tsa Lekgotla la Unisa tse di gona fa
- Ditokololo tsa bodipolomate
- Badirammogo le nna, ditokololo tsa khuduthamaga ya Unisa le
botsamaisi jo bo atelositsweng
- Mop. Thenjiwe Meyiwa, Mothusamogokgo: Dipatlisiso, Dithuto
tsa morago ga Kalogo, Boitshimoleledi le Bogwebi
- Ngk. S.D. Selematsela, Mokaedikhuduthamaga: Ditirelo tsa
Laeborari le Tshedimosetso

- Ditokololo tsa kgwebo le mekgatlho ya baagi
- Mekgatlho ya Unisa ya baithuti le badiri
- Baeng ba rona ba tlotlegong maitseboeng ano: baamogedi ba dikgele tsa rona tsa dipatlisiso
- Baitumedisi ba rona maitseboeng ano, Gaabo Motho Tenors
- Baeng ba ba tlotlegang, bomma le borra

Madume go lona lotlhe phirimaneng eno. Mo boemong jwa motšhanselara wa rona, yo e leng moamogedi wa dikgele tsa maitseboa ano tsa dipatlisiso, gammogo le lekgotla le botsamaisi jwa Unisa, ke boitumelo le tlotla e kgolo go nna go le amogela ka diatla tse di bothitho mo Moletlong wa Unisa wa Ngwaga le Ngwaga wa Dikgele tsa Dipatlisiso le Boitshimololeli. Motlha ono o botlhoko monate mo go nna, gonne ke dikgele tsa bofelo tsa me mo maemong a me jaaka Mogokgo le Motlatsamotšhanselara wa Unisa. Le ka ne le itse gongwe le sa itse gore ke tlaa bo ke rola marapo kwa bokhutlong jwa ngwaga, morago ga go dira dipaka tse pedi jaaka Mogokgo le Motlatsamotšhanselara, mme ka jalo ke bua le lona maitseboeng ano ke le mo maikutlong a itshekatsheko.

Le gale nka le netefaletsa gore ke sa ntse ke dumela gore yunibesiti eno e kgethegile mme e lejwa jalo – bosetšhaba, mo kontinenteng le boditšhabatšhaba. Ga go bolo go nkgakgamatsa

gore rona, ba re dirang kwa Unisa, e kete ga re lemoge ka botlalo boleng jwa teemane ya togamaano e go tweng Unisa, mme ke nna ke ipotsa gore a mme tota re itumelela thoto eno ya botlhokwa ka se e leng sona, gongwe bokgoni bo bo boitshegang bo e nang le bona jwa go tliša diphetogo. Ee, ke dirisa lefoko la "boitshegang" ka bomo, le tshwaelo e re tswelelang go e dira mo lephateng la thuto e kgolwane ya boleng ka nako e e leng nngwe ya dikgwetlho tse dikgolo mo thutong e kgolwane.

Nnete ke gore letshwaokgwebo la Unisa le sa ntse le tlotlwa, mme le fa ka dinako dingwe re kgalwa mo bobegakgannyeng jwa selegae, re na le serodumo se se elediwang ke bontsi jwa balekane ba rona sa boleng jwa thuto le seemo sa dipatlisiso tse re di tlamelang – se, le fa tota re se yunibesiti e e gatelelang dipatlisiso mo go kalo. Mme fa e le gore o ne o na le pelaelo malebana le go nna teng ga rona go go golang mmogo le ka moo re amang ka teng mo dipatlisisong tsa thuto e kgolwane, lebelela fa thoko ga gago – lebelela badirammogo nao: Ke badile dikgele di ka nna 100 maitseboeng ano. Kgato ka kgato re tsweletse go aga se ke dumelang gore e tlaa nna serodumo se se elediwang ke ba bangwe sa dipatlisiso – dipatlisiso tse di maleba e bile di dira mo bokaong jwa rona jaaka yunibesiti e e akaretsang ya Seaforika ya ODeL.

Fa ke ne ke rulaganya pegelo ya me ya kwatara ya ntlha go ya kwa Lekgotleng, ke buisitse pegelo e e akaretsang tota ya maemo e e rulagantsweng ke DIRPO. Maikaelelo a porojeke e ne e le go swetsa ka seemo sa Unisa mo maemong a a farologaneng a lefatshe, le magareng ga balekane ba rona mo ODeL.

Le ka itse gore jaaka setheo sa ODeL, bontsi jwa ditlhokego tsa tlwaelo tsa go baya maemo bo ka se dirisiwe mo go rona, mme ka tshwanelo re ka botsa dipotso ka bomaleba jwa tsona mo Unisa. Tota go na le dipatlisiso tse di gona tse di belaelang ntlha e yotlhe ya go bewa ga ditheo tsa thuto e kgolwane ka maemo, gone ka ntlha ya go se tshwane gono. Le fa go ntse jalo, maemo ano a dirisiwa ke diyunibesiti tse dintsi go itepatepanya le tse dingwe le jaaka sedirisiwa sa papatso – jaaka re itse go ya ka maitemogelo a rona mono Aforikaborwa.

La ntlha le gale, jaanong re na le maemo a a maleba mo ditheong tsa ODeL a a fitlhelelang dipeelo tsa karolo eno. Mme a mosola thata mo go rona, bogolo segolo fa go tla mo go itepatepanyeng le ba bangwe. Ka jalo, go naya sekai, mo pegelong ya 2020 ya Lefatshe ya Maemo a Diyunibesiti, ke diyunibesiti di le nne fela tsa thuto ya o le kwa kgakala tse di neng di akareditswe, mme tsona e ne e le Yunibesiti ya Anadolu (AU), Yunibesiti e e Buletsweng botlhe ya UK (Open University UK (OOUK)), Yunibesiti

e e Buletsweng Botlhe ya Catalonia (Open University of Catalonia (OUC)) le Yunibesiti ya Aforikaborwa (Unisa). Bano ke balekane ba rona mo lefatsheng fa go tla mo dipeelong tsa maemo.

WUR Rank	Institution	Country	Overall Score	Teaching Score	Research Score	Citations Score	Industry income	Internat. outlook Score	FTE students	Students per staff	Internat. Students	Female to Male ratio
501-600 501-600	The Open University	United Kingdom	35,3-38,7 33,5-37,0	18,2 18,5	16,1 16,4	66,5 68,5	34,8 34,4	57,6 54,4	61 915 64 638	32,3 34,0	8% 8%	62 : 38 61 : 39
501-600 601-800	Open University of Catalonia	Spain	35,3-38,7 26,0-33,4	16,5 12,8	14,2 12,5	74,2 71,3	35,8 34,9	40,2 39,8	22 902 20 133	84,5 54,6	2% 3%	56 : 44 55 : 45
1001+ 801-1000	Anadolu University	Turkey	10,7-22,1 19,0-25,9	13,0 11,6	24,0 23,9	16,5 17,5	100,0 100,0	17,3 16,4	830 104 1 413 003	493,5 865,8	1% 1%	37 : 63 44 : 56
1001+ 1001+	University of South Africa	South Africa	10,7-22,1 9,8-18,9	22,1 20,2	19,1 15,8	15,0 9,9	35,2 34,9	43,7 35,0	193 874 163 520	155,2 106,7	7% 8%	67 : 33 67 : 33

Badiramongo, tota le fa diyunibesiti tse dingwe tse tharo di le kwa bokone, e leng se se ka ba ungwelang malebana le maduo a serodumo, Unisa e dirile sentle, fa e tshwantshanngwa le tsona. **Ka kakaretso**, OUUK le OUC mmogo di nnile le maduo a a kwa godimodimo a 35,3-38,7 (33,5-37,0 ka 2019) di latelwa ke AU le Unisa ka 10,7-22,1 (9,8-18,9 ka 2019).

Fela karolo e e kgathisang ke eno, re lebile maitlhommo a rona maitseboeng ano: mo **dipatlisisong**, AU e fitlhetse maduo a a kwa godimodimo a 24,0 (23,9 ka 2019), e latelwa ke Unisa ka 19,1 (15,8 ka 2019), OUUK ka 16,1 (16,4 ka 2019) le OUC ka 14,5 (12,5 ka 2019). Ka jalo, Unisa e dirile sentle fa re lebelela ditlamorago

tša serodumo sa dipatlisiso.

Malebana le ***dinopolo***, go mo pepeneneng gore diyunibesiti tša kwa bokone di itsege botoka kwa Yuropa. OUC e fitlheetse maduo a a kwa godimodimo a 74,2 (71,3 ka 2019), e latelwa ke OUUK ka 66,5 (68,5 ka 2019). AU, e e kwa Turkey, le yona e fitlheetse maduo a a kwa godingwana ga Unisa, ka 16,5 (17,5 ka 2019), fa Unisa e nnile ya bofelo mo karolong eno, ka maduo a 15,0 (9,9 ka 2019).

Badiramongo, fa dipatlisiso tša rona di le mo maemong a bobedi, fela dinopolo tša rona e le tša bofelo, gona re tshwanetse go belaela boleng, bomaleba le ditlamorago, mme re botse gore goreng go nopolwa di se kae fela. Ke eng se re tlhokang go se dira go tokafatsa ntlha eno ya dipatlisiso tša rona? Re phasalatsa mo dijenaleng di fe? Ke bomang ba buisang dipatlisiso tša rona?

Go ya ka se ke se itseng ka tiragatso ya rona ya dipatlisiso monongwaga, badiramongo, ke dumela gore re ka tokafatsa maduo ano – tota, nka rata go bona Unisa e le kwa godimo mo maemong a ODeL mo dingwageng tše tlhano tše di latelang. Re setse re le babatlisisi ba ba ithomileng pele ba ODeL mo kontinenteng, ka jalo, tlaya re atolosetseng seo kwa lefatsheng. Ke dumela gore re ka fitlhelela seo. Re beilwe mo karolong e le

nngwe le diyunibesiti tse dingwe tse tharo gonne go na le dintlha di le mmalwa tse re tshwanang natso ka tsona – ba re ba tshwantshanya dilo tse di tshwanang, ka jalo gee, tlaya re amogeleng kgwetlho eo.

Ke itse sentle gore go na le karolo ya dipatlisiso e e ka tshwaelang mo go godiseng seemo le ditlamorago tsa dipatlisiso tsa rona. Ke bua fano ka *go nnela leruri* ka ditebego tsotlhe tsa gona, le jaaka go tlhalosiwa mo SDGs. Ka jalo ke itumetse tota gore *Go dira le baagi go fitlhelela Diphitlhelelo tsa Ditlhabololo tsa Leruri (SDGs)* ke moonno wa rona wa beke ya R&I mo 2020. Tota go nnela leruri ke ntlha e e mo lefatsheng lotlhe – e seng mo thutong e kgolwane fela, *gongwe le gongwe*, jaaka fa dinnete tsa lefatshe le tikologo ya rona e e fetogang di re ruta dithuto tse dintsi tse di boima.

Rona mo Aforika, bogolosegolo Unisa jaaka setheo sa ODeL se se mo Aforika, re ka dira tshwaelo ya motheo mo diSDG ka dipatlisiso tsa yona, boitshimololeli le go golagana le baagi, re sa bue ka go ruta le go ithuta! Re amogetse MIT, re tswelletse ka botlhaga go latelela ditirisanommogo tsa rona, re fitlhelwa mo bontsing jwa baagi ba re ba direlang, mme, badirammmogo, re na le mafaratlhatlha a a elediwang ke mongwe le mongwe – mo kontinenteng ya rona le go ralala lefatshe. Re tshwanetse go

dirisa mesola eno jaaka re godisa bokgoni jwa rona jwa dipatlisiso le ditlamorago.

Re kokoane fano maitseboeng ano go tlotla bagarona ba ba botlhaletlhale le ba ba gaisang ka ntlha ya boporofešenale jwa bona, maitlamo a bona a a tswelolang mo dipatlisisong, boitshimololeli le tirisanommogo, le katlego e e bonalang e ba e fitlheletseng. Ke a le akgola lotlhe ka ntlha ya boineelo jwa lona le maitlamo mo maphateng a lona le ntse le lwela botswerere ka dinako tsotlhe. Mokgwa oo ke ona o o tlaa re dirang setheo sa ODeL sa maemo a ntlha mo lefatsheng, le nngwe ya diyunibesiti tse di dirang go gaisa mo Aforika. Badirammmogo, ga go bonolo go dira dipatlisiso o ntse o ruta. Go go tlhoka go dira go feta tekano – mme se gantsi se ama ba ba kwa gae – mme ka jalo re leboga bamalapa a lona le baratiwa ba lona ka ntlha ya tshegetso le boitshoko, le seabe se ba nnileng go tshwaela mo katlegong ya lona.

Go baamogeladikgele ba rona maitseboeng ano, ke lebogela boineelo jwa lona, boporofešenale jwa lona le go intsha setlhabelo. Re motlotlo go lemoga maiteko le diphitlhelelo tsa lona bosigong jono. Re a le a le tlotlomatsa, re a le akgola, mme re itumela le go ipela le lona.

Ke a leboga.